

四庫全書

經部

欽定四庫全書

經部

厚齋易學卷二

詳校官侍郎臣劉躍雲

通政使司副使臣莫瞻菴覆勘

滕錄副貢生臣杭光晉

滕錄監生臣任溥

欽定四庫全書

經部一

厚齋易學

易類

提要

臣等謹案厚齋易學五十卷宋馮椅撰椅字儀之一作奇之號厚齋南康都昌人宋史馮去非傳云父椅家居授徒所著易書詩語孟輯說等書共二百餘卷今多不傳惟所輯易說尚散見永樂大典中考胡一桂啟蒙翼傳

引宋中興藝文志云寧宗時馮椅為易輯注
輯傳外傳猶以程迥朱熹未及盡正孔傳名義
乃改彖曰象曰為贊又以隋經籍志有說卦
三篇改繫辭傳上下為說卦上中俞琰讀易
舉要所說亦同今檢永樂大典所載但有輯
注輯傳而無所謂外傳者與舊說殊不相合
以椅自序核之當日蓋各為一書輯注止解
彖象輯傳則尊彖象為經而退十翼為傳外

傳則以十翼為經各附先儒之說而斷以已
意永樂大典編纂不出一手割裂其文雜附
於各卦爻下遂併外傳之名而沒之今反覆
參校釐為輯注四卷輯傳二十八卷外傳十八
卷仍分三書以還其舊輯注多用古文如坤
卦黃裳之裳作常蒙卦瀆蒙之瀆作黷屯卦
磐桓之磐作般邇如之邇作亶師卦大人作
大人旅卦資斧作齊斧雖異今本而皆根舊

義至如履否同人諸卦以為舊脫卦名宜補
姤彖女壯勿用取下以為衍女字之類則倚
之自抒所見者也輯傳各卦皆分卦序卦義
彖義又義象占諸目縷析條分至為詳悉其
蒐採亦頗博洽如王安石張弼張汝明李椿年
李元量李舜臣閻丘昕毛樸馮時行蘭廷瑞
諸家其全書今皆不傳尚藉是以存梗槩外
傳薈粹羣言亦多所闡發其以繫詞為說卦

宗吳仁傑之本董真卿周易會通駁之良是
明楊時喬周易古今文乃以合於隋志取之
斯好奇之過矣然合觀三書皆元元本本淹
貫宏通要不以一二微瑕掩也啟蒙翼傳又
云鄱陽汪標手編諸家易解為一鉅集名經
傳通解以椅易解為底本求古今解增入孟
宋元之際甚重其書今標書亦不傳則此書
彌可寶貴矣董真卿胡一桂皆稱是書為易

輯宋史藝文志作易學文獻通考則作厚齋
易學考王湜先有易學宜有所別故今從通
考之名焉乾隆四十六年九月恭校上

總纂官

臣

紀昀

臣

陸錫熊

臣

孫士毅

總校官

臣

陸

費

墀

厚齋易學自序

周易一經文王困於羑里即包犧氏所畫之卦立大衍之法推七八九六之數以生爻而繫之辭者也古有官占即畫觀象以事揆理而遂知休咎至夏商各為一書曰連山歸藏意每卦為之辭矣蓋間或畧見於傳記也然庖犧氏畫八卦因而重之為六十有四以盡其變故連山歸藏之辭至六十又四而止文王則以所重之卦復衍其爻為三百八十又四乃別為辭以繫卦於以體

其常創為辭以繫爻於以盡其變故定名曰易文王既
沒周之子孫乃著其代以別夏商而曰周易然猶與連
山歸藏並列於卜筮之官而謂之三易者蓋因周之易
云爾其實夏商以前不謂之易也自孔子定六經止贊
周易門人又述其緒言以為之傳而連山歸藏始廢易
道始尊先漢以來儒家者流宗主孔氏遂以孔贊與周
易並行以孔贊等篇為傳而改上下篇為上下經此其
始變也後以孔贊參入經文自費直鄭康成倡之王輔

嗣和之而世不復知有文王之易矣何也取信於孔子之贊而不復推究文王之本指一也孔子推明人事而象數之本言焉而不發至使後世屏棄之間知學此則又多穿鑿傳會以為之說二也甚至繫卦之辭為彖孔子題彖以推明之而今繫以彖曰而彖反為孔子之傳矣繫爻之辭為象孔子題象以推明之而今繫以象曰而象亦為孔子之傳矣孔門說卦三篇將以推明繫辭之指今題以繫辭上下而繫辭又為孔子之傳矣易之

稱周或以為周匝庖犧之卦例以為易八卦之重以為
文王六爻之辭以為周公凡一經之名義錯亂無一存
者況文王之本指乎天開我宋聖道日明康節邵氏首
定經傳之序呂氏微仲晁氏以道從而訂之近日吳斗
南復是正之沙隨程可久晦菴朱文公先生皆以註解
傳雖名義微有未盡當而文王之全經則天高日白矣
椅自束髮受易於先人蓋伯祖父以此經鳴於三舍予
數十年來博親師友搜攬衆說遂以文王之本文如王

氏所傳乾卦之文為正而為之輯註訂其音切釋其文
義辯其異同使讀者粲然識其大指不惑於支離然後
輯孔子贊傳左氏占辭及諸儒之說撮其不悖於大義
者釐為輯傳義有未備者傳以己意又於孔子之傳裒
輯衆說別為一書庶不相亂俾萬世復見文王之全經
孔子曰文王既没文不在茲乎信哉伯祖父蓋黼其名
宋嘉定十年丁丑歲夏五月辛卯既望草堂馮椅序

孔子之贊易止於彖文蓋其成書也孔安國稱先君孔

予贊易道以黜八索此書是已蓋述周文王之易而贊述其義聲韻相叶實贊體也孔子沒門人追述其平日講說問答之辭與夫所傳於古而記之有補於易者為之傳則文言說卦是已何以知之以其書有子曰有古語有占法而知之也至於序卦雜卦其猶孔子之遺書與不然何雜卦之聲韻與贊相似也史謂孔子晚而好易讀之韋編三絕而門人記其言有曰加我數年卒以學易可以無大過矣夫孔子之於羣經初不若是其綢

繆也而獨於易焉見之何哉蓋昔者文王之作經也即庖犧所重之卦演而生爻以陰陽奇耦之數位畫雜居之象仰探造化旁稽物理近察人情自為類例字字有據然不明言其故而使人觀象玩占以見諸行事至孔子時與連山歸藏並列於卜筮占者不勝異說而易道晦矣孔子憂之於是即卦之彖爻之象以知之所及者為之贊又間以新意推廣文王所未言者此非沈酣紬繹不能以臻此也至於文言說序雜卦諸篇又其平日

之與門人講說與夫記錄古語之舊者天下後世以信
孔子而信周易故異說屏除而連山歸藏與八索俱廢
文王之經如離明當天而衆星蔑矣中更秦火而此書
獨以卜筮獲存亦可知天意之未喪斯文也奈之何儒
生坑戮解散間得所傳者私自名家大義紛錯文言止
於乾坤故費直參入於經說卦三篇漢初出於河內女
子今止存其一而又有繫辭上下二篇夫繫辭云者文
王之經而非傳也意者後人以其間推明繫辭之指而

目之與要即所謂說卦上中篇也今所謂說卦者乃止
下篇爾是說也近世吳斗南知之若夫所謂十翼云者
以其羽翼周易蓋十篇也十篇之次猶多異說然其槩
可知也彖象之贊各釐上下篇為四說卦合今之繫辭
上下篇為三文言序卦雜卦各一是其目也今釐贊於
經以合於傳復孔門全書之舊哀粹諸儒之說為之輯
注庶有補於世教云爾斯亦孔子贊易之心也是日椅
又叙

欽定四庫全書

自序

欽定四庫全書

厚齋易學卷一

宋 馮椅 撰

易輯注第一

經上篇

乾至否

周官太卜掌三易之法一曰連山二曰歸藏三曰周

易其經卦皆八其別皆六十有四

筮人同

鄭少梅曰自包犧以至夏商八卦雖重而未知所謂
七八九六之常變也連山始艮歸藏始坤夏商用之

皆以不變為占故其數止於六十有四而已文王因
姜里之囚用以卜筮遂竄易繇辭更改術數立大衍
之說開萬有一千五百二十之策使一卦可以衍六
十四焉故名曰易易者變也後世謂文王重六十四
卦不知洪範已有貞悔連山歸藏其別已六十四矣
案周易之義唯鄭氏得之其曰演六十四卦著七八
九六之爻竄易繇辭立大衍之說誠為確論

按傳言神農黃帝皆有易卦而以連山歸藏為氏則

二書不始於夏商也古之聖人凡改置宗社則禮文
不相沿襲以應天命包犧始畫八卦令筮者重之而
為六十有四其序則今之周易是也神農用之則退
乾坤而首艮以其立乎春冬之交終始萬物也黃帝
用之則退艮而首坤以其太極之前以陰含陽而萬
物生死於土也意五帝則承用包犧八卦之序然皆
未有辭也夏改正朔易服色故舍包犧八卦之序而
用神農之連山以夏正建寅位乎艮也商舍連山而

用黃帝之歸藏以商正建丑衝乎坤也意夏商卦下

亦各有辭故周人並存以為占

如左氏所載季友之占其文曰友在公之

石間於兩社為公室輔又曰同復於父敬如君所說者謂即夏商之占辭

文王贊述包犧

之卦衍著之數推九六之變以生爻故卦爻各系以

辭定名曰易自孔子贊文王之易而夏商之書廢矣

然則名書以易自文王始文王以前曰卦而已孔子

言包犧始作八卦不言易也周官之三易其亦因文

王之易而并稱之乎亦猶夏商稱帝而因周文武併

稱三王也

正義曰傳云二篇之策則是六十四卦舊分上下篇
乾坤象天地咸恒明夫婦乾坤造化之本夫婦人倫
之原

韓康伯曰先儒謂上經明天道下經明人事夫易六
畫而成卦三材必備錯綜天人以效變化豈有天道
人事偏於上下哉

古者以韋編方冊故曰篇後世以紙帛舒卷則曰卷

又其後鋟木以印彙而裝之則謂之帙矣曰篇云者
存古也文王繫辭於卦爻而方冊繁重故離而為二
曰上下篇孔子謂二篇之策是也世傳子夏傳與汲
冢書皆然蓋文王之經孔子之傳各為一書初不相
參田何孟喜之徒以孔子之書為傳乃題上下經以
別之經之名立而篇之名亡曾不知篇之所置則有
上下而經非有上下之分也甚者於坎離咸恒之叙
去其次第之辭而竟以咸自為首則是天地之間有

二易也豈不謬哉

周岐陽地名著代也此書文王之所作故稱周易夷
繹反此書之名文從日從月取陰陽更代之義蓋指
奇耦之畫相易也

上篇上去聲篇方冊之名或方或冊編之以韋故文
从竹从編省方木板冊竹片也方冊繁重故分為二
篇目以上下謂置首編於上次編於下也



乾下
乾上

伏犧畫八卦卦止三畫筮則重之共為六畫奇畫屬陽乾之策也故三畫皆奇其卦名乾重卦又乾則止名曰乾古者以此六畫為卦之象不題卦名

乾元亨利貞

乾竭然反文王所題此卦之名而系之辭者也蓋健而无息之謂在人為君父非居下者之所能當也元亨利貞此文王所系卦辭謂之彖者也左氏謂之繇疑即傳寫之轉蓋剛柔雜居六位之象筮得六位之

數皆九者以此占之蓋占寓於象也元始也大也亨
通利宜貞正而固也析言之則四者各為一德合言
之則為大通而宜正也筮者具是德則吉苟不正固
則不能大通矣

初九潛龍勿用

初九此下第一畫爻位之名文王題此以志而系之
辭者也初位也九揲著所得之數以四積之凡三十
六策餘爻皆七則占此爻後並倣此潛龍陽氣隱伏

地下之象潛隱伏也龍象陽氣之升降變化也後人以其專主一爻謂之小象而卦辭為大象云勿用占勿不可也並文王所系此爻之辭亦曰繇筮得之者不可用事若有位者則不可用在下之人也

九二見龍在田利見大人

九二下第二畫爻位之名見龍在田陽氣發達地上之象見濁聲自隱而顯之稱用九同田謂地上也利見大人占見清聲大人以大德居正位之稱爻與筮

者相為主賓自為一例人有見龍之德則在我利於
見之若有見龍之德者則天下利見之也又為在我
利見九五之大人

九三君子終日乾乾夕惕若厲无咎

九三第三畫爻位之名君子終日乾乾夕惕若下卦
之終陽氣充滿於世之象直以人事言之亦象也君
子告筮者乾乾健行之至惕他歷反怵也懼也若語
辭猶曰如曰然或讀惕字絕句引文言因其時而惕

誤厲无咎占厲力世反危也說文作𨾏非无今無天
傾西北故以天屈西北咎其九反文从人从各相違
也違則相尤說文災也以洪範休咎之證為義二說
隨其文義所取唯不自寧則雖危可以免咎

九四或躍在淵无咎

九四第四畫爻位之名或躍在淵已離下體陽氣欲
升于天之象或者疑而未定之辭躍弋灼反无所緣
而絕于地之名蓋習飛也淵者上空下洞之所不言

龍承初二之文无咎占可進則進无咎也

九五飛龍在天利見大人

九五第五畫爻位之名飛龍在天陽氣騰翔於天之象
上二爻為天五在天之下曰在天者自下而仰觀之
也利見大人占言大君之升天位天下利見之也若
居天位者筮之則為利見九二之大人

上九亢龍有悔

上九第六畫爻位之名以在一卦之上故變文言上

與初九同例亢龍陽氣極於天而忘反之象亢若浪反極於上而不能下之名有悔占悔呼內反過而追恨之意筮者能變而不至於極則悔亡

用九見羣龍元首吉

用九總言六爻用九之義非爻位也筮得六位皆九者以此占之乾坤純體特立此例或以傳之上九非也辭意與上九相蒙耳見羣龍六爻皆動陽極欲生陰之象總六爻故曰羣龍元首吉占元首猶元為戒

首之義吉凶者失得之象吉謂於理得之筮者如其象則吉

䷁ 坤下
䷁ 坤上

坤元亨利牝馬之貞君子有攸往先迷後得主利西南得朋東北喪朋安貞吉

耦畫屬陰坤之策也故三畫耦其卦名坤再筮得坤則陰之純也故定名下坤上坤此卦之名坤困魂反古文以立卦之畫也文王所題蓋順而有常之謂元

亨利牝馬之貞象牝頻忍反陰類也馬莫補反以行
地言之君子有攸往先迷句後得主利句西南得朋
東北喪朋安貞吉占先後喪皆去聲攸所也陰闇故
先則迷主陽也後於陽明則得所主而利西南陰方
故得朋東北陽方故喪朋筮得六位皆八數者以是
占之蓋其象為大亨而以順為正也君子欲有所往
不可為先而後則得所主而利西南則得其朋類東
北則喪其朋類大抵安於正則吉也

初六履霜堅冰至

初六六耦畫之動數蓋揲著而得二十四策以四計之也餘爻皆八者則占此爻後並倣此履霜陰氣始凝之象履鄭讀為禮非堅冰至占陰氣盛則水凝為冰曰堅告筮者以見微知著也

六二直方大不習元不利

六二直方大坤道中正之象不習元不利占內直外方則大矣不待習而自利也筮者有其德則其占如

是

六三含章可貞或從王事无成有終

六三含章陰氣包陽之象含古函章陽之文明也陽掩陰謂之包陰掩陽謂之函陽饒陰乏也可貞或從王事无成有終占以臣道言之凡言或皆如乾九四之義言當含蓄其文明之德可以正固自守矣或不必貞而出從王事但不居其成功則有終也

六四括囊无咎无譽

六四括囊陰陽閉塞之象括古活反結也閉也囊乃剛反所以貯物言結其囊口而不出也无咎无譽占譽平聲稱道也一讀去聲名也朱子曰過實之名筮者惟當謹密則无過亦无聲名

六五黃常元吉

六五黃常正位大臣之象常文從巾下服也俗從衣作裳元吉占能安其常分則大善而吉也

上六龍戰于野其血玄黃

陰極陽戰俱傷之象占在象中言有爭必傷不言凶
凶可知也

用六利永貞

用六六爻皆六元八者以此占之利永貞固守其正
之象象在占中永久也凡例詳於乾坤二卦後同者
並不複出



震下
坎上

一陽動於二陰之下其卦名震一陽陷於二陰之中

其卦名坎震下坎上動而險陷故成卦曰屯

屯元亨利貞勿用有攸往利建侯

屯卦名張倫反鬱結不通也文象艸穿地出而未申
元亨利貞大亨而宜於正固之象辭與乾同而卦義
小大有異勿用有攸往利建侯占宜建立侯國也筮
得之者為大亨而利於正未可遽有所往立君者遇
之則吉也

初九般桓利居貞利建侯

初九般桓畏險而不輕動之象般步干反今磐槃皆轉注般桓回旋之貌一曰動而有阻之貌利居貞利建侯占凡事難進唯在所處之正亦為立君之吉占六二屯如亶如乘馬班如匪寇昏媾女子貞不字十年乃字

六二屯如亶如乘馬班如亦畏險而不進之象屯說文作𠂔如語辭亶張連反回也俗作𧰨說文驢皆非乘平聲班古文分布也文從刀分玉下馬為班人馬

異處也左氏傳班馬之聲書班師古語則然說文作
驢鄭作般皆非匪寇昏菑女子貞不字十年乃字占
昏菑今轉注從女或作構非男曰昏女曰姻菑男女
合也禮女子許嫁笄而字占昏則雖不遽合終歸於
成宅事以此例之

六三即鹿无虞唯入于林中君子幾不如舍往吝

六三即鹿无虞唯入于林中進陷于險之象即就也
鹿晁曰古文今麓山足也或讀如字引秦失其鹿天

下競逐之義則是見鹿矣何以虞為誤認古文也虞
人山澤之官君子幾不如舍往吝占幾平聲近也或
作機或聲祈非舍去聲止也或上聲非吝良刃反古
者說文遯不足之意又恨惜也一曰固執也書改過
不吝言即山足以從禽而无虞人以導之則入於林
中而迷所向矣君子之於事物雖可幾及而不如止
之往則有入於林中

六四乘馬班如求昏藉往吉无不利

六四乘馬班如遇險而止不深入之象求昏毒句吉
无不利占言事必待所親以共濟則得之而且无不
利矣亦為昏姻之吉占

九五屯其膏小貞吉大貞凶

九五屯其膏德澤鬱結不下於民之象膏去聲德澤
也贊謂施未光故知去聲舊讀平聲誤小貞吉大貞
凶占事之小者固守則吉大事則凶

上六乘馬班如泣血漣如

上六乘馬班如陰難雖出而窮无所之之象泣血漣
如占漣聲漣相繼不絕之貌說文作漣言自傷其屯
之極也



坎下
艮上

陽明陷於陰險其卦名坎一陽極於上而止其卦名
艮坎下艮上在險而止莫知所從故成卦曰蒙

蒙亨匪我求童蒙童蒙求我初筮告再三黷黷則不告

利貞

蒙莫公反物所蔽曰蒙亨卦有亨義故繫於卦下後
並倣此匪我求童蒙童蒙求我我主卦而言以象告
占者童未冠之稱字書轉注作僮初筮告此下占辭
筮市制反問而決之也著之稱筮義蓋同此告聲誥
報也再三黷讀則不告黷聲讀煩數溷亂之意王作
瀆說文握持垢非

初六發蒙利用刑人用說桎梏以往吝

初六發蒙開啓蒙昧之象發開啓也利用刑人用說

桎梏以往吝占說今脫或聲稅非桎聲質杻也梏古
毒反械也在足曰桎在手曰梏皆禁錮人之具

九二包蒙吉納婦吉子克家

九二包蒙容受蒙昧之象包今苞或作彪非吉納婦
吉子克家以包蒙為象而繼之昏取有子之吉占

六三勿用取女見金夫不有躬无攸利

六三勿用取女蒙昧不有其身之象象在占中取今
娶見金夫不有躬无攸利主取者而言謂上九也勿

用取此見金夫之女蓋金者彊暴之象一日見利而動得金即為夫不能自有其身委身於人无所利也

六四困蒙吝

六四困蒙蒙昧无所開發之象困者窮而不通之謂

六五童蒙吉

六五童蒙天真未散之象吉占

上九擊蒙不利為寇利御寇

上九擊蒙蒙蔽怙終懲治之象不利為寇利御寇占

御今禦寇暴也



乾下
坎上

乾陽上進前遇坎險姑少待焉故乾下坎上成卦曰

需

需有孚光亨貞吉利涉大川

需待也今或作需非有孚光亨所需有信而亨之象
孚相信也或作專鄭讀為秀非貞吉利涉大川占言
能待而有信則亨得正則吉事雖難必濟皆欲其需

之也

初九需于郊利用恒无咎

初九需于郊遠于坎水之象垌外曰郊郊外曰野郊言去水之遠也利用恒无咎占恒胡登反久也

九二需于沙小有言終吉

九二需于沙漸近坎水之象小有言終吉占有言有違言也言漸近於難雖有言語終无所失

九三需于泥致寇至

九三需于泥迫近坎水之象致寇至占致諳送也謂有以來之難逼而招寇

六四需于血出自穴

六四需于血出自穴見傷而避之象占在象中血言其傷也筮者能待雖在傷地而終得出也

九五需于酒食貞吉

九五需于酒食為需之主安養以待之象食聲似貞吉占言如是而正固則吉也

上六入于穴有不速之客三人來敬之終吉

上六入于穴退處而不為險阻之象有不速之客三人來敬之終吉占速召也不召之客三人言乾之三陽也需之終則不復需矣故不召而自至也但能敬之則終无所失



坎下
乾上

乾剛坎險兩不相下故坎下乾上成卦曰訟

訟有孚窒惕中吉終凶利見大人不利涉大川

訟兩相爭而言之於公也有孚窒惕自信堅執不通而警懼之象窒塞也惕義見乾九三中吉此下占辭中不過也一讀去聲中半而止也如中興之中終凶訟不可終利見大人以剛中正決訟者不利涉大川險不可濟占戒訟者隨其所處之得失為吉凶也

初六不永所事小有言終吉

初六不永所事陰柔不能竟訟之象小有言終吉占九二不克訟歸而逋其邑人三百戶无眚

九二不克訟歸而逋自知不勝而退辭之象克能也
逋聲晡逃竄也其邑人三百戶无眚占眚生領反裁
也過也眚文從目從生目生翳之名故為裁亦為所
見不明而過失也

六三食舊德貞厲終吉或從王事无成

六三食舊德退歸於本邑而无訟之象人臣食舊邑
之食古者度德而受祿故曰食舊德此卿大夫之訟
貞厲終吉或從王事无成占言訟而正固不變則厲

能守舊則終必吉也或肯從君命以事但不可居其成功

九四不克訟復即命渝安貞吉

九四不克訟復即命不能訟而聽聽訟者之命之象復聲伏即就也命九五之命渝安貞吉占渝聲俞變也變其欲訟之志而安於正也如是則吉


九五訟元吉

九五訟元吉象在占中以剛中正居尊位聽訟之道

无善於此

上九或錫之鞶帶終朝三褫之

上九或錫之鞶帶終朝三褫之始得而終失之象占
在象中錫或讀作賜非鞶主子雍作繫古通帶陸從
篆作帶三平聲或去聲褫或省作褫解也鄭作拊徒
可反晁氏曰如拊紳之拊乃得象意


坤上 坎下

坎險坤順以順行險又九二一陽在下而統衆陰故

坎下坤上成卦曰師

師貞大人吉无咎

師衆也用兵以衆故謂士卒為師貞大人吉无咎象
在占中以至正大公行師乃得吉而免咎大予夏崔
憬李鼎祚同揚雄以下作丈一經无稱丈人者此必
誤林黃中同此說

初六師出以律否臧凶

初六師出以律師出必用法度之象否臧凶占否今

不臧善也不善謂不以律也

九二在師中吉元咎王三錫命

九二在師中吉元咎王三錫命象在占中親統衆而得君之吉占言在師之中故也三或讀去聲再三也錫鄭作賜非命謂恩數

六三師或輿尸凶

六三師或輿尸將權不一之象或說見乾九四輿所乘蒸徒從焉故為衆尸神所主故為主衆主謂軍權

欽定四庫全書

不一也一說師敗輿載亡尸而歸亦通凶占

六四師左次无咎

六四師左次退舍之象左上聲兵法偏將軍處左左者不用之地如人之左手也左氏傳凡師一宿為舍再宿為信過信為次次者按兵不行之謂无咎占

六五田有禽利執言无咎長子帥師弟子輿尸貞凶

六五田有禽師出獲敵之象田獵也為田除害故曰田禽俗作擒謂鳥獸之就擒捕者也利執言无咎長

子帥師弟子與尸貞凶占伐有罪者必聲言其罪故曰執言所謂奉辭伐罪也

上六大君有命開國承家小人勿用

上六大君有命開國承家小人勿用師還賞功之象象在占中古者諸侯皆有君道唯天子曰大君猶后之稱元后也命賞命也將帥之功上者開國為諸侯次者承家為卿大夫承受也朱子曰戒行賞者于小人不可用此占而小人遇之亦不可用此爻亦通



坤下
坎上

坎水坤地水在地上其勢相比故成卦曰比

比吉原筮元永貞元咎不寧方來後夫凶

比毘志反親傳也吉比則吉矣故直以占為象原筮
元永貞元咎此卦象皆在占中原再也如原廟原蠶之
原元永貞詳見輯傳不寧方來不寧人不自安也方
來各以其方來歸詩書論語方來其義皆同後夫凶
後去聲陰以陽為夫謂九五也猶所謂夫夫是也非

夫也之稱朱子曰筮者得之當為人所親傳然必有元永貞之德然後可以當衆之歸而无咎其未比而有所不安者亦將來歸之比人者必再筮以自審其人有元永貞之德則亟歸之若又遲而後至則彼交已固此來已晚而得凶矣

初六有孚比之无咎有孚盈缶終來有它吉

初六有孚比之无咎有孚盈缶終來有它吉求比于人之象戒以有孚者而後比之則无咎有孚盈缶為

信有諸已充實之象缶方九反瓦器爾雅曰盎也喻中心也終來有它吉占它或轉注作佗謂所比者也此爻有二象占一言已比于人一言人來比已已比于人必求其人之有孚人比于已必在已者孚信充實于中也

六二比之自內貞吉

引類以達于君之象自內內偕初六也君謂九五正應貞吉占也

六三比之匪人

六三比之匪人所親非其人之象元占朱子曰其占
大凶不言可知王子雍本有凶字

六四外比之貞吉

六四外比之上親于君之象外謂九五貞吉占能親
其上則正而吉矣

九五顯比王用三驅失前禽邑人不戒吉

九五顯比天下顯然歸之之象王用三驅失前禽邑

人不戒吉占王者用此顯比之道行田獵三驅之禮
蓋三面驅之闕其一面禽之來者取之背而前往者
舍之故曰失前禽凡物之可擒捕者謂之禽書外作
禽荒是也邑王者所都諸侯國中也不戒不待告戒
今轉注作誡泰不戒以孚乃是本文

上六比之无首凶

上六比之无首凶不能率衆以比于君之象无首言
无能為首也與乾用九辭同而指差異凶占

䷀

乾下
巽上

乾之三陽上進而巽以一陰畜之故乾下巽上成卦

曰小畜

小畜亨密雲不雨自我西郊

小畜小言巽之一陰也畜敕六反一作蓄止而聚之
也或許六反非亨以象為占密雲不雨自我西郊我
指本卦西郊陰方也陽先倡則雨陰先倡故不雨

初九復自道何其咎吉

初九復自道陽氣得上復其正之象復聲伏陽本在上之物故自下升上曰復此言由其所復之故道也何其咎吉占

九二牽復吉

九二牽復三陽牽聯以復之象謂下牽初上牽三也吉占

九三車說輶夫妻反目

九三車說輶不能前進之象車今輿說今脫輶聲腹

說文車軸縛也王作輻夫妻反目占反平聲今翻怒
視貌

六四有孚血去惕出无咎

六四有孚大君信任之象血去惕出无咎占血言傷
也馬云當作恤意古文去去聲避之也出亦避之
意

九五有孚攣如富以其隣

九五有孚攣如人君與大臣合志之象與四有孚攣

力專反膠固之貌富以其鄰占陽實為富以左右之也其指本文隣近指上九也

上九既雨既處尚德載婦貞厲月幾望君子征凶

上九既雨既處畜道成而陰陽和之象處上聲相安以居也尚德載婦貞厲此為妻占尚以德載己者若婦人以此為貞則慎矣故危



乾 兌下
上

乾剛在前兌從其後而履之故乾上兌下成卦曰履

履履虎尾不咥人亨

履有所躡而進之意當有志卦緣下有履字後遂脫贊先釋卦而復出履虎尾可見今補之後同人艮並放此履虎尾不咥人亨所履雖危而不害之象咥杜結反嚙也或作齧占在象中

初九素履往无咎

初九素履素其位而行之素中庸作係往无咎占往謂前進遇九二中正故往无咎

九二履道坦坦幽人貞吉

九二履道坦坦所履夷易寬裕之象道路也言所行之道坦坦而寬平也幽人貞吉占居山澤之間而上無應幽人之象居中貞之象能貞固自守則吉進則漸迫虎尾危道也朱子曰幽人履道而遇其占則貞而吉矣

六三眇能視跛能履履虎尾咥人凶武人為于大君

六三眇能視跛能履視履不正之象眇妙小反目不

正視貌跛波我反履虎尾咥人凶武人為于大君占
諸侯皆有君道大君天子也

九四履虎尾愬愬終吉

九四履虎尾履至剛之後之象愬愬終吉占謂以恐
懼而致福也愬馬作𩇑說文𩇑晁曰皆聲色恐懼貌
九五夬履貞厲

九五夬履決於所行之象貞厲占雖正而危當知戒
懼

上九視履考祥其旋元吉

上九視履考祥相視所行以驗休咎之象祥者吉凶之兆也讀如禎祥之祥其旋元吉占窮高極遠而能旋反則盡善而吉矣



乾下
坤上

乾天也在下坤地也在上蓋天之氣下交於地地之氣上交於天天地之氣和暢成泰故乾坤相交成卦曰泰

泰小往大來吉亨

泰郭子和曰通之大者也一曰安而舒也小往大來
天地交之象三陰小而往外三陽大而來內吉亨占
如是而吉是以亨也

初九拔茅茹以其彙征吉

初九拔茅茹三陽同體相援牽聯而進之象拔蒲八
反茅鄭作苗非茹汝据反耿曰如茹葦之茹謂茅之
始生包其秀可茹者也毛曰根相連也以其彙征吉

占彙古曾類也或上聲或作偉或黃非三陽以其類往外吉也

九二包荒用馮河不遐遺朋亡得尚于中行

九二包荒用馮河不遐遺朋亡同三陽以進而无私之象包一作苞荒今荒不治也馮今憑徒涉曰馮河遐遠也謂外三陰朋謂內三陽也荒謂初馮河謂三也得尚于中行占行道也謂六五中道之主尚上之也配也

九三无平不陂无往不復艱貞无咎勿恤其孚于食有福

九三无平不陂无往不復陰陽各欲復其所之象陂彼偽反傾也或破何浦寄二反非陽來在下升上則傾矣陰往在外降下則復矣艱貞无咎勿恤其孚于食有福占能知艱而復上之正可以无咎恤憂也朱子曰孚所期之信也謂勿憂其上之相孚但往上而自有食祿之福矣于往也

六四偏偏不富以其鄰不戒以孚


六四偏偏三陰下墜之象偏今翮王作篇詩偏偏者
佳鳥相繼斜飛之貌不富以其鄰不戒以孚占不富
謂陰虛以左右之也鄰謂五上不待告語相孚而下
復

六五帝乙歸妹以祉元吉

六五帝乙歸妹人主下應賢臣之象帝乙湯也歸謂
嫁也以祉元吉占以祉有所錫賚也祉福也

上六城復于皇勿用師自邑告命貞吝

上六城復于皇坤土復于地之象皇今隍子夏作堙
姚作湟皆轉注城下池也刷土為皇皇為下池今城
土復圯于池也勿用師自邑告命貞吝占衆散而不
可用但自整戒邑貞固守之猶有吝也



坤下
乾上

乾上坤下天地不交否塞之時故成卦曰否

否否之匪人不利君子貞大往小來

否之匪人陰小閉塞之象否備鄙反卦內同閉也塞也匪人謂三陰匪吉人與比卦同義据例欠志卦朱子曰或云之匪人三字衍不利君子貞占君子謂三陽以居上為貞陰長則消矣故不利大往小來天地不交之象

初六拔茅茹以其彙貞吉亨

初六拔茅茹三陰同體相援牽聯以進之象說同泰以其彙貞吉亨占守在下之貞則吉而亨

六二包承小人吉大人否亨

六二包承聯三陰以同體之象小人吉大人否亨占
小人陰柔之象大人中正之象陰陽不交故九五與
二否隔然正應終必亨通

六三包羞

六三包羞援三陰以進之象占在象中包以上包下
二陰也羞進也讀如可羞於王公之羞

九四有命元咎曷離祉

九四有命命行於下之象否隔之世上下不交四與下接故有命无咎屬離祉占屬今疇類也離去聲麗也命行乎下則九五上九其屬類也皆麗其祉不為陰剝

九五休否大人吉其亡其亡繫于苞桑

九五休否息一世否隔之象休息也大人吉其亡其亡繫于苞桑占再言其亡也其亡也繫聲計苞桑桑之方苞者也

上九傾否先否後喜

上九傾否傾覆一世否隔之象先否後喜占先後並
清聲喜去聲喜其否之傾也卦體否故云先否爻位
傾否故云後喜

欽定四庫全書

厚齋易學卷二

宋 馮椅 撰

易輯注第二

經上篇 同人至離



離下
乾上

上乾天也君也下離六二一爻在離之中人位也乾
上離下五陽同歸二之一陰有以天同人之象亦為
人君同乎斯人之象故成卦曰同人

同人同人于野亨利涉大川利君子貞

同人與人同也舊脫志卦今補之据贊衍同人曰三字當是錯簡後人因更增曰字同人於野亨无所不同之象爾雅邑外曰郊郊外曰牧牧外曰野四方之所輻湊无有隔礙於此同人无不亨通利涉大川利君子貞占離中虛有舟虛能載之象載上三陽健於行水故利涉大川君子謂六二成卦之主陰柔疑為小人故告於君子貞則利貞位當也

初九同人于門无咎

初九同人于門同人于近之象无咎占

六二同人于宗吝

六二同人于宗親其所親之象吝占

九三伏戎于莽升其高陵三歲不興

九三伏戎于莽內懷異志之象莽莫蕩反草莽也升其高陵三歲不興占大旱曰陵升高以望其所敵而三歲之久不敢興戎

九四乘其庸弗克攻吉

九四乘其庸隔於所同而欲通之之象庸今轉注墉垣墻也欲同二而隔三如庸故乘之弗克攻吉占弗克攻三

九五同人先號咷而後笑大師克相遇

九五同人先號咷而後笑隔於所同而後相遇之象號平聲咷道乃反啼呼也先後清聲大師克相遇占用大衆以克所隔之人然後相遇

上九同人于郊无悔

上九同人于郊遠人之象无悔占



乾下
離上

一陰居尊位而五陽歸之是大其所有也大謂陽故
乾下離上成卦曰大有

大有元亨

大有衆陽為六五柔中之君所有元亨以象占大亨
也

初九无交害匪咎艱則无咎

初九无交害遠於君而无友助之象謂當此之時无交則害匪咎艱則无咎占所處疎賤固應无交匪已之咎但知進之難則終達於上故无咎

九二大車以載有攸往无咎

九二大車以載三陽同力以任重之象車聲居古輿通大車兼三陽為象載上卦也有攸往无咎占

九三公用亨於天子小人弗克

九三公用亨于天子乾應乎離之象位當上下之交
故取此象公諸侯之尊稱亨許庚反諸家作享然以
王用亨于西山之象例之亨字是也古亨享通故相
亂耳然亦通用也小人弗克占

九四匪其彭无咎

九四匪其彭大臣遠權勢之象彭古旁通子夏作旁
今傍步郎反匪其彭謂不招乾之三陽以進也无咎
占

六五厥孚交如威如吉

六五厥孚交如上下相信之象如語辭威如吉占恐有君弱臣強之患故威如乃吉

上九自天祐之吉无不利

上九自天祐之乾之三陽上進之象乾為天吉无不利占


艮下
坤上

艮山之高退處坤之下又坤陰在上而一陽退處其

下皆為退遜之象故艮下坤上成卦曰謙

謙亨君子有終

謙嗛不自滿之意子夏作嗛亨卦有亨義因以為象
君子有終占

初六謙謙君子用涉大川吉

初六謙謙謙而自卑之象諸說以贊以四字為句聯
君子讀之殊不知與鳴謙之象同用涉大川者乃君
子事也君子用涉大川句吉占

六二鳴謙貞吉

六二鳴謙有聲而不自居之象鳴鳥語也貞吉占

九三勞謙君子有終吉

九三勞謙有功而不自居之象君子有終句吉占

六四无不利撝謙

六四无不利占撝謙不受而卻其謙之象此爻象在

占後撝毀皮反卻去也古麾今揮

六五不富以其鄰利用侵伐无不利

六五不富以其鄰左右同德謙虛之象利用侵伐无不利占潛師曰侵聲罪曰伐

上六鳴謙利用行師征邑國

上六鳴謙象同六二利用行師征邑國占



坤下
震上

豫利建侯行師

初六鳴豫凶

六二介于石不終日貞吉

六三盱豫悔遲有悔

九四由豫大有得勿疑朋盍簪

說者謂簪貫髮之象然古无簪又曰簪即弁服之笄
鹽鐵論曰神禹治水遺簪不顧夫鹽鐵論乃漢人之
言非古也遺簪之事不見於經難據也姑從訓釋无
害於理焉耳

六五貞疾恒不死

貞疾猶曰痼疾也痼猶固也疾自外入者也

上六冥豫成有渝无咎



震下
兌上

隨元亨利貞无咎

初九官有渝貞吉出門交有功

六二系小子失丈夫

六三系丈夫失小子隨有求得利居貞

九四隨有獲貞凶有孚在道以明何咎

九五孚于嘉吉

上六拘系之乃從維之王用亨于西山



巽下
艮上

巽風作於艮山之下有落葉之象又下巽上止事之
所以敗也故巽下艮上成卦曰蠱

蠱元亨利涉大川先甲三日後甲三日

蠱聲古蠱壞之名元亨象物之蠱敗者其元氣尚存
故亨蓋蠱以元而亨也利涉大川先甲三日後甲三
日占事壞必求其濟故利於涉大川日取甲者造事

之始之義先後各三者周天之運凡六甲也先後並如字

初六幹父之蠱有子考无咎厲終吉

初六幹父之蠱修飭尊者所壞之事之象有子考无咎厲終吉占有子能幹其蠱則事雖蠱於考而修飭之可以无咎也有拂人情或更張則危而終歸于吉九二幹母之蠱不可貞

九二幹母之蠱修飭家事之壞之象不可貞占謂不

可以為正也

九三幹父之蠱小有悔无大咎

九三幹父之蠱象同初六小有悔无大咎占

六四裕父之蠱往見吝

六四裕父之蠱緩以修飭尊者所壞之事之象裕寬緩也或曰益之也往見吝占謂不可以有行也

六五幹父之蠱用譽

六五幹父之蠱象同初六用譽占譽去聲用有聲譽

之臣以幹其父之蠱

上九不事王侯高尚其事

上九不事王侯遺去有事之象高尚其事占蠱者有事之卦飭蠱則有事也上在卦外又蠱之終可飭者已飭之矣不可飭者无所自飭也故不事而其事為高尚



兌下
坤上

以爻之序而言則二陽偪四陰而臨之以卦之象而

言則地臨乎澤之上故兌下坤上成卦曰臨

臨元亨利貞至于八月有凶

臨有二義偏也覆也臨偏之臨去聲臨覆之臨平聲
元亨利貞大者亨通而利於正之象至于八月有凶
占八月詳見輯傳

初九咸臨貞吉

初九咸臨與物相交相感而相臨之象去聲九二同
咸感而臨之也貞吉占

九二咸臨吉无不利

九二咸臨象吉讀无不利占

六三甘臨无攸利既憂之无咎

六三甘臨以甘言媚說臨下之象上四爻臨皆平聲
无攸利既憂之无咎占臨非其正本无所利知其非
正而憂之能改則无過咎矣

六四至臨无咎


六四至臨臨之盡道之象至當也盡也无咎占

六五知臨大君之宜吉

六五知臨知高天下而足以統臨之象知今智大君之宜吉占

上六敦臨吉无咎

上六敦臨以篤厚之道臨下之象敦篤厚也林黃中曰增培之義吉无咎占臨之以厚故得其道而免咎


坤下
巽上

以巽成坤下之四陰仰乎上之二陽二陽在上以示

乎下故坤下巽上成卦曰觀

觀盥而不薦有孚顒若

觀去聲示也盥而不薦有孚顒若以象為占譬之臨
祭盥滌器浣手薦或作薦祭也言有孚于下下之觀
者見其盥已信敬不待薦而後知也故有孚顒魚恭
反仰望貌若語辭

初六童觀小人无咎君子吝

初六童觀卑遠而觀不能見之象下四爻觀皆平聲

童稚矮小在衆人之後相去又遠所觀不及謂觀九五也小人无咎君子吝占君子小人以位言也五上兩爻同小人位卑不能有見乃其分也故无咎君子而在下位亦无所觀君子之羞也

六二闕觀利女貞

六二闕觀自內覘外之象闕窺通苦圭反竊闕也如闕豹一班之闕女貞占釋文一本有利字以初爻例之无利字為當

六三觀我生進退

六三觀我生下觀上而可見之象我主九五本爻為客陽主生育故曰我生進退占謂進可觀五退可自保

六四觀國之光利用賓于王

六四觀國之光近天子之光之象國指九五利用賓于王占王九五也如作賓于王家之賓謂以客禮見王者乃利也

九五觀我生君子无咎

九五觀我生人君中正以示天下之象觀二爻並去聲我爻自我也示我之所以生育天下之道君子无咎占言如此而後君子无咎

上九觀其生君子无咎

上九觀其生推戴大君以示天下之象其指五也君子无咎占



震下
離上

合六畫有頤中有物之象物麗於頤必動而噬之頤乃合故上離麗下震動成卦曰噬嗑

噬嗑亨利用獄

噬嗑市制反齧也嗑胡臘反合也亨象卦有亨義頤噬其物而噬之乃得亨也利用獄占用獄所以去間去間而後合故利

初九屨校滅趾无咎

初九屨校滅趾懲惡於其初之象屨紀具反校爻教

反以木絞校者也即械也校者通名屨校所謂桎也
滅沒也止今趾足指也桎其足而沒其止也无咎占
告在獄者

六二噬膚滅鼻无咎

六二噬膚滅鼻惡之寢長而深治之之象膚方于反
皮之表也无咎占告獄者三五同

六三噬腊肉遇毒小吝无咎

六三噬腊肉遇毒惡堅而不服之象腊聲昔小物全

乾之名毒肉有毒者也小吝无咎占

九四噬乾肺得金矢利艱貞吉

九四噬乾肺得金矢惡雖寢堅而得其情之象乾聲
干下同肺緇美反肉傳骨之名說文作𩚑子夏作脯
鄭作簣于爻義无取乾肺最難于噬者鈞金束矢詳
見輯傳利艱貞吉占利於艱貞乃吉盖非易噬之物
六五噬乾肉得黃金貞厲无咎

六五噬乾肉得黃金以中道治惡而罪疑從輕之象

乾肉輕於腊肺黃金贖刑也貞厲无咎占存貞厲之
念謹刑而不輕決乃得无咎

上九何校滅耳凶

上九何校滅耳懲惡於怙終之象何今荷校枷也何
之於首者也沒其耳重枷也凶占長惡不悛故凶



離下
艮上

坤之一陰自上而來二以文乾成離之明乾之一陽
自二而往上以文坤成艮之止故離下艮上成卦曰

賁

賁亨小利有攸往

賁彼偽反文飾也或甫寄符文反或謂古班字並非
亨小象因其質而賁文之无其質則文无所施故所
亨者小小謂六二文乾也利有攸往占天下有自然
之文不容但已故以有攸往為利往謂上九往文坤
也

初九賁其止舍車而徒

初九賁其止致飾于其初之象止同噬嗑初九舍車而徒占舍今捨車今興古居與余二聲通用鄭張作興徒行也

六二賁其須

六二賁其須致飾於其上之象占在象中須今鬚

九三賁如濡如永貞吉

九三賁如濡如致飾潤澤之象如語辭濡聲儒永貞

吉占

六四賁如皤如白馬翰如匪寇昏媾

六四賁如皤如白馬翰如未致飾而人求之之象皤
白波反或聲煩髮白貌或作皤波皆非翰戶旦反叶
聲寒董黃曰馬舉頭高仰貌謂所賁髮白而猶未加
飾有乘白馬翰飛而來賁之者謂初九也匪寇婚媾
初九正應也


六五賁于丘園束帛戔戔吝終吉

六五賁于丘園束帛戔戔飾致于幽隱而以物將之

之象丘園隱逸者之所居束帛聘幣戔戔委積貌薛
虞云禮之多也在干反或聲戔或作殘殘者非吝終
吉占

上九白賁无咎

上九白賁終於致飾成文之象白賁即繪畫之事後
素功也无咎占謂能以白賁五采則无咎


坤下
艮上

上艮一陽在上二陰在下下坤三陰凡五陰消去一

陽故坤下艮上成卦曰剝

剝不利有攸往

剝普卜反讀如八月剝棗之剝擊也又邦角反割也裂也諸爻以割裂為義不利有攸往无象有占往則剝陽矣

初六剝牀以足蔑貞凶

初六剝牀以足毀下之象足牀之最下以象初也以謂欲剝牀先剝其足也下以同蔑貞凶占蔑荀作滅

今文貞正也滅正道故凶

六二剥牀以辨蔑貞凶

六二剥牀以辨毀漸近上之象辨皮莧反說文判也
正義足與牀分辨之處崔云牀桎或作辦古通辦故
誤蔑貞凶占義同初六

六三剥无咎

六三剥无咎不隨衆以毀上之象象意寄於占今本
作剥之无咎京劉荀一行皆无之字釋文一本有之

字非後人以贊有之字遂疑經脫此一字增入也

六四剥牀以膚凶

六四剥牀以膚毀及其身之象膚或作簋非凶占

六五貫魚以宮人寵无不利

六五貫魚羣陰相次而進之象魚陰物貫之則不亂以宮人寵无不利占以宮人之寵寵之无有不利者矣寵今文古龍

上九碩果不食君子得車小人剥廬

上九碩果不食陽實不剝之象碩大也食式亦反君
子得車小人剝廬占車從董遇晁曰古文今興羣陰
上載之象廬上覆下本爻之象



震下
坤上

一陽自剝反下來居主內而上復故震下坤上成卦
曰復

復亨出入无疾朋來无咎反復其道七日來復利有攸
往

復聲伏去而還其所也又為陽氣自下而復上之義
亨象一陽之氣上達則亨矣出入无疾朋來无咎反
復其道七日來復利有攸往占出乎剝入乎復无有
害之者朋類之來誰復咎之自上反下自下復上其
道皆以七日為節故七日而來復也自復以往至于
六陽无不利者反今翻疾或以為疾速之疾亦通
初九不遠復无祇悔元吉

初九不遠復至近而先復之象无祇悔元吉占祇聲

支辭也玉篇曰適也李氏曰謂擇善而行无適於悔
以詩易考之亦祇以異祇攬我心祇自塵兮易此爻
與坎祇既平適義皆通或以為徒亦通而无所据或
以為底而詩祇自底兮則底自底祇自祇義不相蒙
餘說益難据元吉大善而吉也

六二休復吉

六二休復優裕自得以復之象吉占

六三頻復厲无咎

六三頻復頻今瀕古通水厓也瀕於勢窮而後反也
或作顰蓋說文謂人所賓傳頻蹙不前而止遂以為
真也厲无咎占

六四中行獨復

六四中行獨復與衆俱行而獨能從善之象以象為
占中行行於五陰之中乃獨能復也

六五敦復无悔

六五敦復躬自厚以復於善之象敦者厚之至也无

悔占

上六迷復凶有裁眚用行師終有大敗以其國君凶至
于十年不克征

上六迷復昏闇而忘反之象迷失道也凶有裁眚用
行師終有大敗以其國君凶至于十年不克征占裁
今灾猶災傷害也眚目不明也以猶及也其國謂上
卦坤也君謂六五也十年坤之極數雖久如此不能
行也



震下
乾上

无妄元亨利貞其匪正有眚不利有攸往

朱子謂史記作无望自文王以來多為无望之義馬
季長鄭康成王子雍皆同斯義古人用字聲同者義
亦通之如豫之為預履之為禮噬嗑之為市合不一
端而足今觀卦內作无所期望而有得其義多通序
卦之意非可如此推也蓋動出於人則為之而期其
成有所望也動而聽命于天非可期望也

初九无妄往吉

六二不耕獲不菑畲則利有攸往

六三无妄之災或繫之牛行人之得邑人之災

九四可貞无咎

九五无妄之疾勿藥有喜

上九无妄行有眚无攸利



乾下
艮上

下乾三陽欲上復而上艮止之故乾下艮上成卦曰

大畜陽為大言乾為艮所畜也

大畜利貞不家食吉利涉大川

大畜與小畜聲義同謂大有所畜也利貞象陽以上復為貞不家食吉利涉大川占食石易反又聲似亦通謂不食於家出而事君乃吉亦為不家家而食之惟養賢以及萬民

初九有厲利已

初九有厲前有危阻不進之象利已占已止也或作

己非

九二輿說輶

九二輿說輶載重而不能進之象以象為占義並同

小畜

九三良馬逐利艱貞日閑車衛利有攸往

九三良馬逐三陽駸駸上進之象逐鄭姚作逐逐利艱貞日閑車衛利有攸往占日或作曰非車今輿利于知難而守正故日閑習其車衛而往則利矣

六四童牛之牯元吉

六四童牛之牯制其剛而畜擾之之象童去其角而平之如童子之去其髮之貌今山之去木者亦曰童牯劉表云角也鄭作角陸績云當作角元吉占

六五豮豕之牙吉

六五豮豕之牙象同六四特變文爾豮符云反豕去勢曰豮牙或作互非吉占

上九何天之衢亨

上九何天之衢陽德達于上之象何歎辭也衢路也以象為占



震下
艮上

上艮而下震動頤之象也又六畫亦象頤故震下艮上成卦曰頤

頤貞吉觀頤自求口實

頤頤也口所以飲食飲食以養生故以養為義貞吉象在占中觀頤觀平聲觀二陽之所養也自求口實

四陰中虛當自求所以實口者

初九舍爾靈龜觀我朵頤凶

初九舍爾靈龜觀我朵頤四陰就養於一陽而養之
不足之象舍今捨朵多果反下垂貌木垂為朵故世
以花為朵也朵頤下垂以受物也靈龜心之至神之
象爾尔通對我之稱我指本爻爾四陰也盖本爻告
四陰之辭朵京劉作端多辯也凶占言本爻不能養
四陰而為辭以卻之陰陽皆凶

六二顛頤拂經于丘頤征凶

六二顛頤拂經于丘頤捨上而就養于下之象顛反也反頤于初九也以上養下者頤之常道經常也丘言其高如丘嫂之丘謂上九也拂戾也謂反養於下戾以上養下之常經征凶占既就養於下則往上為凶上不應也

六三拂頤貞凶十年勿用无攸利

六三拂頤失其所以為養之象捨上九而從下體以

動為拂其所願貞凶十年勿用无攸利占違正應而從所昵固守則凶雖十年之久不可用也

六四顛頤吉虎視眈眈其欲逐逐无咎

六四顛頤就養于下之象義同六二吉占虎視眈眈其欲逐逐威不勝愛之象眈丁南反垂首下視貌其指本爻逐逐言勇於從正應是其所欲雖虎視之專弗顧也无咎占

六五拂經居貞吉不可涉大川

六五拂經戾以上養下之常之象居貞吉不可涉大川占居貞吉猶用靜吉也故不可涉大川用作凶也上九由頤厲吉利涉大川

上九由頤天下由已以養之象厲吉利涉大川占其事雖危已當任責故吉所養者衆則可以濟事



巽下
兌上

陽居中而陰半之是陽過于陰也陽大陰小故巽下兌上成卦曰大過

大過棟橈利有攸往亨

大過去聲過越之過非經過之過也棟橈本末俱陰弱陽居中獨隆之象棟屋之脊梁也橈乃教反曲而折也利有攸往亨占往以救棟橈之弊故亨

初六藉用白茅无咎

初六藉用白茅以柔乘剛之象无咎占

九二枯楊生稊老夫得其女妻无不利

九二枯楊生稊陽本弱而復生之象枯鄭聲姑非稊

徒稽反鄭作莢木之更生者老夫得其女妻无不利
占女未嫁之稱

九三棟橈凶

九三棟橈下弱之象凶占

九四棟隆吉有它吝

九四棟隆陽實居中之象隆壯實也吉有它吝占

九五枯楊生華老婦得其士夫无咎无譽

九五枯楊生華陽末弱而復生之象華古夷聲字後

作荇今花老婦得其士夫无咎无譽占譽平聲此爻

叶韻

上六過涉滅頂凶无咎

上六過涉滅頂弱不能濟之象過水津也過涉勇濟也沒頂則溺而不出矣凶无咎占謂无所歸咎



坎下
坎上

一陽陷於二陰之中其卦為坎為陷為險復筮得坎是為重險故成卦曰習坎

習坎有孚維心亨行有尚

習坎習重習也坎苦感反險也陷也或作埴飲水岝
曰坎有傾陷險阻之義蘭曰習者積習相繼之義有
孚行險以信之象二五中實維心亨行有尚占言二
五之心相通以求濟險也尚配也如得尚于中行之
尚水流行之物以坎遇坎故行險則有配

初六習坎入于坎窞凶

初六習坎重重遇險之象入于坎窞凶占窞徒坎反

虞翻坎中小穴或陵感反水鍾于穴大曰潭小曰窟
九二坎有險求小得

九二坎有險居險而未出之象既曰坎矣而又有險
未能出也求小得占小謂小事小物

六三來之坎坎險且沈入于坎窞勿用

六三來之坎坎進退皆險之象石曰之往也險且沈
入于坎窞勿用占沈古文薛同平聲沈溺也險或作
檢沈或作枕玷按皆非

六四樽酒簋贰用缶內約自牖終无咎

六四樽酒簋贰用缶內約自牖簡禮以結主知之象
樽盛酒器簋聲軌盛食物器內方外圓曰簋內圓外
方曰簋貳副之也缶方九反瓦器虛而有聲可擊之
以當樂內今納約質言也牖牖下謂本爻近臣之象
也或謂簋絕句无貳字內或作內外之內牖或作誘
皆非終无咎占

九五坎不盈祗既平无咎

九五坎不盈欲出險之象謂水不盈所祗既平无咎
占祗義同復初九既平則水不流矣故无咎

上六繫用徽纆寘于叢棘三歲不得凶

上六繫用徽纆寘于叢棘三歲不得獄訟纏綿不能
脫去之象繫義見隨六二徽許韋反纆聲墨三糾曰
徽兩糾曰纆皆索名寘劉作示今置示即寘也叢棘
刺之叢生者也得如罪人斯得之言得其情也凶
占



離下
離上

一陰麗於二陽之中主陰而言曰離再筮得離其象
不易故離下離上成卦曰離

離利貞亨畜牝牛吉

離去聲傳麗也一陰麗乎二陽之中則陽分為二故
取離象與麗聲同亦為麗也利貞亨象上下二卦皆
以陰麗乎中故曰利貞二五中虛交通故亨畜牝牛
吉占主六五而言以下一離為牝牛而畜之

初九履錯然敬之无咎

初九履錯然足躁動之象錯七各反交互也敬之无咎占

六二黃離元吉

六二黃離柔麗乎中正之象黃中之見於色者也元吉占

九三日昬之離不鼓缶而歌則大耋之嗟

九三日昬之離明將沒之象昬古八今吳日在西方

時也不鼓缶而歌則大耋之嗟鼓古鞞今鼓鄭作擊
恐非耄它結反九十曰耄文從老從至謂垂盡也王
子雍它結反或作經咥非嗟古差今本有凶字古文
及鄭本无晁曰无凶字得象數

九四突如其來如焚如死如棄如

九四突如其來如犯上而反之象突徒忽反古倒子
作𠂔或倒𠂔作𠂔說文忽出也今以古文難書改突
從穴從犬以犬從穴忽出為義埶竈之囟出火氣者

謂之突如語辭下卦之火從突出衝上六五大君不可犯來反也自外至曰來焚如死如棄如占上不可犯而犯乃自焚而死死而人棄之以其不順也

六五出涕沱若戚嗟若吉

六五出涕沱若戚嗟若憂傷之象出尺類反自內而外也涕淚也沱徒河反亦作范或作池恐非滂沱大雨也沱若言若大雨然若陸作漣戚古文今戚子夏作喊子六反咨慙也李氏曰慙額而嗟嘆也吉占

上九王用出征有嘉折首獲匪其醜无咎

上九王用出征以君命討不服之象征出師之名征之為言正也正不正也有嘉折首獲匪其醜无咎占嘉賞之也折之舌反上為首折首謂屈服其首者也

曰後世所謂斬首級醜類也所獲非其類謂脅從罔治也